

四庫全書

史部

欽定四庫全書

史部

華野疏稿卷五

詳校官國子監司業臣納麟寶

編修臣裴謙覆勘

總校官編修臣王燕緒

校對官修撰臣戴衡亨

謄錄監生臣曹希焜

欽定四庫全書

華野疏稿卷四

湖廣總督郭琇撰

衰病告休疏

奏為微臣衰朽日甚病勢愈沈惟恐貽悞封疆伏祈
聖恩俯賜罷斥另委賢員以膺重任事竊念臣一介寒
賤至愚至陋七年外吏蒙

特旨行取拔置言路不二載間破例超擢至左都御史
後因臣不職又蒙

皇上特賜寬宥免臣之罪臣何人斯受恩至此及臣十

載田間杜門自守復於前歲六月間聞

命自

天恩出望外

特起臣總督湖廣之職是臣自筮仕以迄今日隆恩異

數哀矜生全皆出自

聖裁則凡受我

皇上格外之知遇者無與臣比但臣年邁力衰前承

恩陞見已將臣病面行陳

奏蒙

皇上以不服水土慰問再三臣祇

命之下不勝感激涕零既到任所因思矢竭犬馬勉供

驅策仰答

高厚於萬一不意臣病已經數載時時舉發且年逾六旬血氣既衰則病覺愈沈去歲自秋徂冬心忡不已及交冬至手足麻木不思飲食然尚能勉強支

持至立春以後積痰上壅頭暈目昏步履維艱甚
至語言亦多恍惚病勢纏綿醫藥罔效臣思鞠躬
盡瘁死而後已自屬臣子常分但念全楚何地總
督何官必須年力健壯智慮精明方克統屬文武
彈壓地方似臣年邁病朽之人軀頹步艱既不可
肅羣寮之觀瞻而髦及智昏又何能為一方之表
率是臣一己之身命不足惜而貽誤於

朝廷之封疆則關係非輕也況臣子年未十齡家無成

丁倘臣倏忽命殞骸骨必不復歸故里臣蒙

皇上恭養三十餘載受

恩最深故敢披瀝陳情哀懇

洪慈憐臣孤蹤允賜罷斥另簡賢能膺此重任俾臣得

回籍調理或不即填溝壑食息尚延則有生之日

皆我

皇上之賜將生生世世永戴

聖恩于無既矣臣職所應辦事務不能卧理恐致有誤

謹將總督關防一顆

王令旗牌十面杆於正月十七日委湖北驛鹽道叅
議張士伋交湖廣巡撫年遐齡暫為代理不勝惶
懼待

命臣以犬馬衰疾圖報無由哀切上陳字多逾格貼黃
難盡未敢另繕伏祈

皇上慈鑒施行

康熙四十年正月十七日題二月初七日奉

旨卿才品優長簡任總督正資料理著照舊供職不必
以衰病求罷該部知道

謝

恩受印疏

題為恭謝

天恩暨微臣接印受事日期仰祈

睿鑒事康熙四十年二月二十七日准署理湖廣總督
印務撫臣年遐齡咨送吏部咨文一件內開湖廣

總督郭琇題為微臣衰朽等事一疏奉

旨卿才品優長簡任總督正資料理著照舊供職不必
以衰病求罷該部知道欽此相應仍咨該督知照欽
遵施行等因到臣准此并准撫臣谷為移送事差
委湖北驛傳鹽法道叅議張士伋臣標中軍副將
張文定捧齋

欽頒總督關防一顆

王令旗牌十面副書吏文卷等項到臣并據署理湖北

布政司事驛傳鹽法道叅議張士伋呈齋前收貯
臣坐名

勅書一道各等因到臣臣于即日恭設香案望

闕叩頭謝

恩祇領受事外伏念臣一介寒微幸際

皇上隆恩異數曠古無比臣身非草木具有心胸寧不

知感激奮勵以思圖報

君恩前月陳情乞休者實以久病纏綿誠恐有誤封疆

重寄也復蒙

聖度優容不加譴斥

溫旨慰留臣聞

命之下涕泗交流感懼無措臣即粉身碎骨亦何能仰
酬萬一唯臣久病之軀氣血既衰右腿殘廢耳目
漸成聾聵臣不勝日夜祇惕然捧誦

聖言俯察臣躬從無寸效堪以報稱倘臣犬馬之疾醫
藥調治或不至即填溝壑自當勉供厥職益矢精

白以上報我

皇上知遇弘恩但蚊負之懼恐致有悞臣故不敢不時
切惴惴耳所有微臣于康熙四十年二月二十七
日接印受事日期謹恭疏

題報伏祈

皇上睿鑒施行

保授郡丞疏

題為省會銜劇郡丞員缺仰請

審鑒擇能員以兼職掌事竊惟楚疆接壤秦蜀黔粵襟
聯吳豫而武昌為省會重地實數省水路通衢五
方襟處舟楫輪蹄往來如織其間良奸混襍猝難
辨別臣自蒞任以來屢嚴飭府縣有司申嚴保甲
以靖地方然保甲之法僅可行之城廂間巷而客
旅江干浮蹤靡定者能保無奸宄之徒潛寓其中
也雖府縣身膺地方之責各有錢穀刑名事務紛
煩詎能分身四應如全委之營汛恐滋生事擾民

臣每深防奸於微之慮反覆籌畫往時設有江防同知一員駐劄漢口久奉裁去此已無庸更議復設夫武昌與漢口兩岸對峙共此一江臣思武昌府清軍水利同知職掌頗閒似可兼江防之任臣愚以為自今請改為江防理事清軍水利同知官不煩于另設事有可以兼舉清釐地方專其責成庶可免貽誤之虞且遇有往來旗人犯事詞件並荊州將軍衙門咨查檔案併令專管料理似為妥

便但官仍此官而任有兼攝職掌匪易必須能幹練
達滿漢兼通之員方克勝任今武昌同知何勲已
陞任員缺查有臣衙門筆帖式圖納辦事勤敏操行
端方熟識漢文才能可任且供職已歷十有二年
諳悉楚省地方情形若以之補授武昌同知允屬
人地相宜也或蒙

皇上另簡賢員俾授此職亦統出自

聖裁臣伏查外省同知無

題補滿洲人員之例顧值此四海一家之

盛世我

皇上宵旰勤民惟期得人而理則亦何分滿漢臣查江
南清江浦理事同知係奉

旨補授滿員再查山西太原府通判係奉

旨改補滿員臣因綢繆地方起見謹援二省之例會同
撫臣年遐齡合詞具疏保

題如臣言可採所有同知關防應擬添江防理事字

樣臣當另疏

題請換給伏祈

皇上睿鑒勅部議覆施行

保補道員疏

題為荆楚地方緊要道員經理需才仰體

宸衷為地擇人特疏保

題懇祈

睿鑒事臣蒙

皇上隆恩總理楚省高天厚地捐靡難酬惟有於地方事宜官員職守殫心籌畫期於萬有一裨是以每有所見敬抒下悃次第入

告矣茲查荊州居楚上游扼川蜀滇黔之衝滿洲將軍駐防其地設有上荆南道分巡荊州安陸德安三府實關至要向因駐防滿營糧餉未有常員管理俱發知府支放其酌撥動用必由督撫藩司相隔九百餘里往返動經旬日所以駐防荊州將軍有

督撫內移駐一貲之請臣恭閱邸抄見有撥銀十萬兩交與荊州駐劄道員之

旨仰見我

皇上睿慮周詳無微不至臣思荊州駐防既於省城隔遠管理糧餉必須切近專員今既撥銀十萬兩交與巡荆道管理則滿營每年糧餉俱應歸併收放又向年奉

旨截留運秦漕米內將九萬六千餘石逐年易換南米

現在收貯荆倉亦應歸併管理庶責成得專又查
武昌道員駐劄省城分守武昌漢陽黃州三府界
連江南江西河南湖南北諸郡上接洞庭中臨大
江為漢沔湘川交匯數省通衢五方雜處稽察水
陸汛防消弭奸宄為全楚保障經畫務期盡善臣
前請將安陸通判移駐新堤又請將武昌同知兼
理江防皆防奸于微之意而提綱挈領尤賴道員
控制下流彈壓重地庶得措置有方此二道者職

掌甚重均為要缺必須廉能勤幹之員方克勝任
現今巡荆道員缺雖陞補有人尚未到任未知其
人之能與否武昌道莊搢內陞員缺尚未銓補臣
查武昌府知府尤汶荊州府知府魏勸此二員居
官廉明辦事勤敏洵稱才守兼優臣於

大計之期會同保

題在案若將此二員以之補授此二缺則是於地方
之情形事勢諳練已久駕輕就熟實為人地相宜

也雖湖省道員無坐名保

題之例但臣從道員職守起見一則為糧餉之責成
綦重一則為要地之綏輯匪易惟期地方有益既
有可用之能員又何敢知而不舉有負以人事
君之義臣謹會同湖廣撫臣年遐齡合詞保

題伏祈

皇上乾斷破格俯允

勅令二員赴京引

見親為簡試應否分缺陞授恭候

聖裁抑臣等更有請者湖南近苗州縣現有調補之例
湖北雖屬腹地但沔陽荊門江陵二州一縣地界
江湖民多刁健節年錢糧拖欠未清歷年

奏銷處分有案官斯土者視為畏途傳舍諸事每致
頽廢臣等再四籌維懇請

皇上或照山陝官員缺出部臣恭請

特簡賢能補授或聽臣等於本省內選擇賢員調補事

關地方理合一併陳明統祈

皇上睿鑒施行

康熙四十年五月十二日題

請遵成例疏

題為虧空之題叅太迫官民之貽累無窮請仍遵奏
銷察核之成例以定催科之期以紓小民之力事
竊惟錢糧五月完半十月全完載在

令甲成憲昭然近准吏部等衙門會覆科臣陳黃永

條奏查叅虧空一疏凡一應錢糧遇完半全完之期解不及額者即行叅處仍令核明侵那實據題叅不得含糊用是侵是那審明具題等語奉

旨欽遵移咨到臣臣當即通飭司府州縣遵行在案但臣再四思維立法防奸誠屬至當而奉行不善其害難言蓋就一省而言除真正富庶之州縣與錢糧甚少之州縣方能按期而完其餘錢糧繁多催科維艱所謂五月者大約延至八月以後十月者

大約延至次年奏銷以前且四月雖曰麥秋九月
雖曰登穀第仲夏之時小民方事播種孟冬之候
田間正在滌場而遽責其及時輸賦賣絲賣穀剝
肉醫瘡誠可憫傷況土地不同氣候亦異湖湘之
間種麥甚鮮五月之時正屬農忙留心民事之官
此時原在停徵以盈千累萬之錢糧而取盈額數
於一時有司止顧考成不顧民命追呼之急如星
如火稍有不前敲撲橫加以致稱貸無門秋成失

望因而戶口逃亡田地荒蕪者有之其為民害可
勝言哉至所謂查參虧空者全憑司府之揭報司
府之揭報亦止可查徵簿之多寡徵多解少即為
虧空其是侵是那必經審明而後可定蓋此官既
有虧空題叅之後即行摘印委官署理然後按籍
而稽訊其根底叅以証佐而為侵為那始可定擬
今若以未經摘印之先遽期查明核定侵那則被
查之員印篆在手何難改換冊籍虛捏款項或稱

小民拖欠勢必調停掩飾是以杜弊之意反為叢
弊之階也臣愚以為五月而即叅完半之虧空十
月而即叅全完之虧空百姓必至受無窮之敲撲
未摘印而先查何者是侵何者是那上官必不能
得其確實是為官民交病而究竟於

國帑無裨益也莫若仍遵成例凡州縣官有虧空等
弊一經察出即行

題叅不必限定五月十月之期而總稽完欠務於奏

銷之前如有隱諱治以通同之罪彼亦無辭至其
是否侵那必行嚴審務得確據以定爰書況近日
直隸撫臣李光地一疏其於承審虧空之處分已
極其嚴峻孰肯以自己之功名身家與人為殉臣
之為此言者非不重

國帑也非有曲庇於州縣官也誠恐追呼過急民命
堪憐查核過早朦蔽益甚其為累更大耳臣七年
外吏十載家居民情吏弊知之最悉故敢直陳於

我

皇上之前如果臣言可採伏祈

皇上睿鑒勅部議覆施行

遵

旨回奏疏

奏為遵

旨明白回奏事康熙四十年十月初七日准吏部咨為

特叅知府挾私揭叅督撫失察請究弊端以清朦

混事內開協理江南道事額外試監察御史左必
蕃題前事本年九月初八日題本月十五日奉

旨這所叅事情著郭琇年遐齡各行明白回奏餘著察
議具奏該部知道欽此到臣准此竊臣一介迂儒至
愚至陋蒙

皇上隆恩不次顯擢拔自田間補授今職臣祇事以來
日夜兢惕常懼隕越有負報稱茲因湖北布政使
任風厚據黃州府知府許錫齡揭叅黃梅縣知縣

李錦虧空一案致臺臣以失察指叅蒙

皇上不即加處分令臣明白回奏捧誦

恩綸感悚無地伏查州縣錢糧戶部定例四月完半九月全完凡有司府揭報虧空督撫例應

題叅解任查究而後知其為侵為那或為民欠也黃梅令李錦其虧空完半之數於七月內撫臣年遐齡方據揭與臣會疏

題叅其是否侵那民欠尚未清查而臺臣疏稱本年

完半之數尚過未久安知不欠在民竊思兵餉急需司府催解完半之時自五月以至七月歷日不為不久矣如果欠在民該縣何難具詳一紙報明上官何遲至叅後臺臣乃以安知不欠在民代為申辨乎至若司據府詳報稱黃梅縣民閉城抗拒不令署事官進城不放摘印官出城又據程騏出首為報明杜禍事詞稱有縣主素所寵用之城長鄉勇以及投拜門生等閉城圍官在玉皇閣起事

見工房張經樞書張弘選差頭藍旭捕役蔡節等
持銀二百兩雇人保留現在絡繹赴省等語臣思
楚俗素稱刁悍今如此行徑委官不得出入良民
不獲貿易將一城內外斷絕往來關係匪輕臣公
同酌議因委武昌府知府尤汶星往曉諭謂爾等
令署官進城清查錢糧如無虧空或叅後全完即
為

題請復任詎意閉城如故而夥衆之要挾聲勢似若

叛然臣再三思維倘不於斯時姑從權宜勢必差
兵查拏驚擾地方貽累滋深仰體

皇上息事寧民至意所以有暫

請李令視事之疏一面示諭聚衆解散安業一面清
算錢糧有無虧空并詳查為首行賄聚衆之奸徒
也今臺臣以為臨蒞之體不當如是且謂保留之
人既可賄買出首之人獨不可疑為許錫齡之賄
買乎又謂督撫既不能細察於前至百姓不服指

為賄買保留代為文飾於後等語自臣觀之是皆
臺臣身居事外之言耳設使臺臣易地而處見司
府詳報程騏之出首謂縣官之寵用有人行賄之
衙役有名持銀有數起事有地聚眾閉城抗拒若
叛值此之際而臺臣猶必曰若令原令視事非長
官臨蒞之體也將任其閉城置之不論乎抑差兵
查拏乎

題請暫令視事而後為查究乎如謂宜叅知府之妾

行揭報方不為之文飾第思虧空尚未查明將以何者為憑而叅其妄揭乎如謂程騏之出首疑為知府之賄買第思出首者之口供鑿鑿有據而知府之賄買無憑若以可疑二字懸擬

題叅冒瀆

天聽臺臣言之則可而非臣之所敢也總之此一案其虧空之有無賄買之真否必俟審明而後定臣前疏業已

請查究其中或李錦之果有虧空或知府之妄行捏
報或閉城之衆係李錦賄買或出首之人係知府
賄買其罪各有所歸也倘查究之後臣等不為據
實糾叅咎亦何辭但未經審明之先而臺臣即以
懸擬之詞指為失察殊不思懸擬之風一倡則天
下事無不可以懸擬而得將在外督撫尚敢叅一
官建一議乎我

皇上至聖至明無微不照其中情事自難逃

皇上之洞鑒也第臣賦性愚直以致言官指叅蓋因舊疾纏綿衰朽日甚精力委屬不及惟祈

皇上乾斷即賜罷斥另簡賢貲膺此重任免致貽誤地方則臣之銜結當生生世世矣臣緣遵

旨明白回奏字多逾格貼黃難盡伏乞

睿鑒俯賜全覽施行謹具奏

聞伏候

勅旨

再疏告休疏

奏為微臣病廢衰朽日甚舊疾復作委難供職不得
不再懇

天恩允賜罷黜事竊臣一介庸儒疊蒙

皇上異數隆恩屢擢顯職至矣極矣臣幸際

聖明之世遭逢

堯舜之君即粉身碎骨亦不能仰報萬一而再疏求去
臣稍有人心何遽至此第臣年已六十有四病勢

纏綿匪朝伊夕氣鬱痰壅遂成痼疾數年來一逢
節至無不感發但有輕重不同耳惟去歲交春之
前氣逆上冲痰積上塞兩腋膨脹如萬刃攢心晝
夜號痛者數日因而右腿積痛竟成殘廢臣時以
封疆關係具

奏乞休乃復蒙

溫旨慰留且以才品優長加臣之身臣何人斯受

皇上之寵遇辱

皇上之褒嘉伏枕自思感激涕零幸而醫藥調理病勢
稍覺痊減因復遵

旨勉供厥職臣自分犬馬捐糜以報臣之分也實臣之
心也詎臣氣血衰枯今歲自夏徂秋南方炎蒸水土
不調感冒暑氣猶然心忡不已至九月二十三
日大感嘔吐昏瞶者二晝夜迨交冬後餘痰上攻
新痰舊證連綿交纏時卧牀褥益覺委頓伏念我
皇上勵精圖治遠過唐虞尤加意吏治民生凡直省督

撫缺出悉由

睿裁慎簡其人無非為保障地方撫綏兆民計也若臣
自蒞任楚地已逾二載識短才庸愧無寸長堪圖
報稱既不能副我

皇上委任至意今復身遭重疾目漸昏眊耳又重聽右
腿久成殘廢即喘息猶存而形神已離尚乃坐擁
高職將上而寮屬下而軍民睹此頽然聾瞶之狀
瞻視之下不幾褻體統而羞當世士哉況楚省幅

員廣闊邊疆之軍防郡邑之利弊官吏之賢否統
於督臣是問此即才力精健思慮深長者猶凜凜
乎曠職之是懼也而顧可委之衰朽病廢之人乎
且所到臣衙門事件非關

國計即係民生以臣久病之軀精神恍惚耳目又復
瞋塞倘有該屬之奸吏舞文本管之積役玩法一
有不檢致干

國典於此之時

皇上即憐臣恤臣思欲全臣而煌煌

令甲欲不戮及臣身而不可得然戮臣之身足蔽貽
誤之辜臣之一身亦何足惜第事關重大雖萬戮
臣身究何能贖貽誤之愆也思及于此臣尚可一
日安于斯位哉若使臣貪職戀爵諱言病廢不思
封疆重寄是益負我

皇上知遇洪恩臣罪滋大此臣之私心惴惴日夜靡寧
而不得不再為哀鳴也伏懇

皇上念封疆所係匪輕病廢如臣妾難卧理

允賜罷斥另簡賢員膺此重任則臣犬馬銜結之私縱
今生無由仰酬

聖恩惟願誓之再生圖報于生生世世矣臣因陳情迫
切字多逾格貼黃難盡伏祈

皇上睿鑒施行不勝惶懼待

命之至為此具本謹具奏

聞伏候

勅旨

康熙四十年十月十八日奏奉

旨卿才品優長簡任總督正資料理著照舊供職不必
以衰病求罷該部知道

原情具題疏

題為瀝血哀鳴等事康熙四十年十月二十二日准
兵部咨開該本部覆雲貴總督巴 題前事內稱
官斌叩

聞一案湖廣係原案發覺之地當日領兵之官同在彼處必有真知灼見請

勅發湖廣督臣提取王世清等與官斌質審情節自明奉

旨這事情著郭琇審明具奏欽此欽遵并發原案到臣臣隨一面檄發湖南按察司提審外臣細查部發案卷知賊首黃明盤踞廣西產崗時三省會拏既經擒獲彼此攘奪爭功事自有之然廣西通判王

世清游擊田國璽等與貴州將弁官斌等既有公報公掣之印文乃又有官斌搶奪之密稟是王世清等以為黃明既在本省汎地今同黔將掣出其功似在黔而不在粵矣故具此密稟希為居功之地殊不知會掣黃明之時止計黃明之獲與不獲耳其功之有無應在於以前各官失察與不失察原不計及于此際也在官斌以為黔粵將領協力擒賊現有公報印文而審官不以印文為憑又不

俟行提到案對質止移取口供遂擬官斌搶奪是真因干部議革職是官斌無功而有過所以激而為叩

閻之舉也臣思搶奪一事固失軍紀自應查明第推其心無非一時邀功之計似與失機縱賊者不同況逆賊黃明久經正法止因兩省將弁爭功藤葛至今懸案三載未經質明其拖累官犯相隔三省往返程途多或萬有餘里少者亦七八千里崎嶇道

路拖累無窮且其中有經別案革職者有經革職
回籍者甚有死亡不存者欲令提齊對質非動經
年月恐未能一時清結也臣愚以為此案如係失
機縱賊罪不容赦亦屬自罹之咎何足為惜至若
官斌即使審明搶奪果真亦不過為邀功之私乃
出師將弁之常念耳原事推情似亦無大過而懸
案逾年拖累多人誠為可憫伏思我

皇上聖德如天宥愆赦過無不覆轡或將官斌復還原

職以彰我

皇上使過之仁仍

勅令赴部引

見試其技勇果有可採俾之効力邊方必克鼓勵自奮

益竭駑駘而未結之案得免拖累即人人沐

皇仁於無盡矣臣敢特疏題

請

寬恩出自

欽定四庫全書

聖裁倘蒙

俞允臣仍將部發質審原案繳部查銷臣謹具

題伏祈

皇上睿鑒施行

康熙四十年十一月初六日題奉

旨官斌著復還原職該部知道

奉

勅薦賢疏

奏為欽奉

上諭事康熙四十年十一月初十日准兵部送到

內閣公文一角內開十月二十五日大學士伊桑阿
馬奇吳璵熊賜履學士辛保傳申來道范承烈曹
鑑倫面奉

旨著行文與總督郭琇張鵬翮桑格華顯巡撫彭鵬李
光地噶禮徐潮將伊等所屬地方道員以下知縣
以上官員內勿論因事故降級罰俸有品行清廉

實心愛民者著寫摺齋送內閣若別省官員內有
伊等真知灼見者亦著開列齋送為此移咨前去
等因到臣奉此臣恭惟我

皇上勵精圖治宵旰不遑殷殷以吏治民生為念一時
循良之盛卓越千古三代以來未之有也迺

聖不自聖安益求安猶以各地方品行清廉實心愛民
之員下詢臣等捧誦

聖諭仰見我

皇上視民如傷孜孜不已之盛心也至臣一介庸愚辦事楚中愧無報稱惟於所屬之員上自監司下逮郡牧時時以清廉二字面加勸諭又於遠屬各官悉心體訪詳行申飭務期吏稱其職民安其業以無負我

皇上簡任司牧愛養元元之意但其中循分守職照常供事所在多有而求其品行清廉實心愛民如

聖諭所及者實以未能多見然據臣平素之所見聞如

武昌府知府尤汶荊州府知府魏勳正已率屬廉明任事前於

計典內臣已會疏

題薦但其任值繁劇叅罰殊多故限於成例部覆未允今承

聖諭諄切不計叅罰此二員者可稱品行清廉實心愛民者也他如才守兼優不負其職者如湖北糧儲道叅政張聖佐蒞任以來革除夙弊操行端方軍

民感悅其署按察司事案無留牘苞苴不入而廉
明之聲著聞于口碑嘉魚縣知縣蔣敷廉潔存心
寬和為政寓撫字于催科而百姓感戴又遠安縣
知縣梁鳳翔才能敏練兼知自守名稱素著及署
理江陵縣任事未幾而能清累年未清之錢糧一
時民情鼓舞爭先完納是足徵其操存之不苟矣
再湖南沅州知州包太隆地屬邊境歷來鎮協駐
劄撫綏良難而愛養民力不事煩苛至其和輯士

卒令兵民相安尤為羣情之所推服以上六貢卓
卓表見皆有實政以及民者也夫湖之南北其守
牧縣令才守可挹者亦自有人然或新任未久或
調補苗邊其廉能之實跡尚當徐俟以觀其成効
至若他省清正之員臣雖間有風聞知之未確何
得冒昧入

陳惟臣屬諸貢係臣素所體訪者緣今欽奉

聖諭不敢不據實上

聞伏祈

皇上睿鑒施行

康熙四十年十一月十六日摺奏

再疏奏謝疏

奏為恭謝

天恩事康熙四十年十一月二十八日准吏部咨開考
功清吏司案呈查得湖廣總督郭琇奏為微臣病
廢衰朽日甚舊疾復作委難供職不得不再懇

天恩允賜罷黜事一疏康熙四十年十一月初八日奉
旨卿才品優長簡任總督正資料理著照舊供職不必
以衰病求罷該部知道欽此移浴到臣准此臣隨恭
設香案望

闕叩頭謝

恩訖竊臣一介庸迂躬逢

盛世荷蒙

皇上隆恩拔自田間畀以封疆重寄臣雖才識疎庸際

茲

異數敢不竭厥駑駘以圖報稱然以犬馬齒迫氣血衰
頽老病百出是以於康熙四十年正月內具有微
臣衰朽日甚等事一疏乞

賜罷黜蒙我

皇上優容

溫旨慰留仰戴

高厚夙夜負慙期于鞠躬盡瘁或少報萬一其如病

勢日增形神俱離實恐貽誤封疆致負

君恩只得再疏求去又蒙

溫旨以臣才品優長簡任總督正資料理著照舊供職
不必以衰病求罷臣捧讀之下感激涕零回思臣之
一身自頂及踵皆沐

皇上生成膺茲

格外知遇之恩臣即木石亦思報効況臣粗識大義具
有心胸曷敢顧惜自愛以罹重愆倘繼此以往仰

賴

聖恩醫藥奏效殘喘暫延唯有誓竭餘生以酬

殊遇但恐久病之軀精力頽廢其於一切吏治民生不
無昏瞶此又臣之所朝夕惴惴者耳臣謹恭疏奏
謝伏乞

皇上睿鑒施行

康熙四十年十二月初二奏奉

旨覽卿奏謝知道了該部知道

華野疏稿卷四

欽定四庫全書

華野疏稿卷五

湖廣總督郭琇撰

糾參州牧疏

題為特參貪庸州牧以清吏治事竊照州牧為親民之官務在潔已奉公愛養百姓乃為不負職守臣自蒞任以來惟思精白乃心日夜冰兢期俾官稱其職民安其業以仰副我

皇上軫恤元元之至意詎猶有貪庸敗檢如彞陵州知

州李廣其人者唯利是視因而上下其手苛剝不恤民命重派惟聽蠹言穢聲著聞大玷官箴者也今據署理湖北布政司事按察使李華之湖北按察使李華之分巡上荆南道副使胡蔚先荊州府知府魏勦各揭報前來與臣訪聞無異謹臚列欵蹟為我

皇上陳之

一本官聽信積蠹雷時豫戶書趙於斯凡事把持

於本年二月初六日在城隍廟喚里民議每斗
田糧除納三錢六分七釐正銀外又苛派銀四
錢八分闔邑約派銀二千餘兩僉點冊書催辦
差役劉先押認以致道路沸騰穢聲彰著里民
劉常如呂家祚等証

一該州有康熙八年安插福建之海丁一百九十
餘名墾荒納糧後隨吳逆叛去所遺田糧州民
頂耕輸賦除納正項外又聽戶書趙於斯等仍

每斗加派銀四錢八分以圖分肥貽累里民趙

愈霞等証

一本官編審不思革除積弊乃聽經承趙於斯受
賄之多寡為戶口之增減於每戶索銀七八錢
不等約計得銀三百餘兩以致里民之有者欺
隱無者冤抑官若木偶竟置罔聞譚君熊黃文
若等証

一該州有川客販賣耕牛每次一二千隻不等每

牛稅銀不過二三分本官聽信兵房李枝先喻見章等管收牛稅其各處買牛者每隻必索銀二錢方發契票漫無覺察兵書牛票可審

此一官者庸鄙性成貪婪無厭任蠹役之調撥致百姓於苦累誠難一日姑容民上所當特疏糾參請

旨將知州李廣革職與有名蠹役犯証一併嚴提究擬者也臣謹會同湖廣撫臣年遐齡合詞具

題伏乞

皇上睿鑒施行

康熙四十一年四月十八日題

三疏告休疏

奏為

君恩高厚已極微臣病勢難支伏乞

聖明垂慈俯賜罷斥以全餘生事竊臣一介草茅辦事

楚中已及三載寸長未效有負

恩眷前臣以久病不痊恐誤封疆兩疏乞休俱蒙

溫旨慰留我

皇上之遇臣者厚矣臣之所以報我

皇上者亦薄矣而屢瀆

天聽冒干

宸嚴臣之罪尚可逭乎而臣心實有不容已者臣年邁

氣衰連歲痰症時時舉發然時作時止醫藥調理

猶得勉強支持唯自去年冬吐瀉之後脾氣大傷飲

食漸減延至今歲交夏以來氣血日枯病勢日增
一日間強起者不過兩三時耳餘皆身卧牀褥不
時昏迷且臣右腿久成殘廢今左腿又復積痛一
舉動全賴人扶瞻視不尊何以臨民似此形狀尚
能表率羣吏而整頓地方也臣思我

皇上勵精圖治遠邁唐虞無時不以吏治賢否民生休
戚惓惓

聖慮若臣以久病之軀耳目聾瞶精神衰憊惶惑之中

或不能為我

皇上澄清吏治奠麗民生

君恩高厚既無由仰報而臣又何辭以謝天下也臣束髮受書父生師教鞠躬致身之義素所講明使臣一息苟延猶得為我

皇上効力封疆臣即捐糜頂踵身填溝壑亦復何憾唯是臣病日篤身不足惜而任大責重一有貽誤百死何贖此臣日夜憂懼而一息不敢自寧者也伏

乞

皇上憐臣餘生格外

垂慈恩賜罷斥另簡賢員膺此重任則臣生固啣環死

當結草將世世子孫俱沐

皇仁於無盡矣臣謹具

奏伏乞

皇上睿鑒施行

康熙四十一年閏六月初十日奏

奏明祈罷疏

奏為微臣病實難支謹遵

旨奏明仰祈

睿鑒允賜罷斥事康熙四十一年八月初六日准吏部

咨開湖廣總督郭奏為

君恩高厚已極微臣病勢難支伏祈

聖明垂慈俯賜罷斥以全餘生事一疏七月初十日奉
旨郭琇丈量地畝事尚未完著俟丈量事完日再行具

奏該部知道欽此移咨到臣臣跪捧伏讀之下仰
見我

皇上勵精圖治宵旰不遑殷殷以吏治民生為念更不
忍使臣任內事件尚有未完以致遺憾於地方也
臣思臣自仕進以至今日蒙

皇上格外之知既生全之復優擢之真所謂

君恩之高高於天

君恩之厚厚於地臣何從測涯際哉臣即矢竭犬馬捐

糜頂踵亦何能報

高深於萬一惟是湖南丈量一事從前奉行未善致多不均經臣

請以武昌道莊播等三員督率清丈查出不均之長沙等州縣衛挨坵捲丈均平以餘補缺與額無虧士民羣集歡呼咸稱永無偏累共沐

皇恩於無疆矣業於康熙四十年四月內

題明在案嗣准部咨又經取冊咨送復准戶部咨查

各州縣丈量田地後果否俱已清楚有無題奏之處令臣查明隨將查明丈量之後悉皆均平清楚並無應行

題奏緣由於本年八月初六日具

題候

旨並咨部查核矣然臣連歲痰證為虐近則病勢日增時而痰壅上冲兩脇塞脹坐卧靡寧醫藥罔效勿論地方事宜涓埃未補而病體惶惑之中精神不

到檢點不周其所以負我

皇上之弘恩者將擢髮莫數其罪臣稍有人心得一日
安於其位耶況楚省地處遼濶最關緊要總督統
制全省所係非輕臣念我

皇上神明天縱無微不至以臣雖年衰病廢
或可勉強辦事亦不意臣之狼狽至此極也故臣
之冒昧陳情一而再再而三乞憐於我

皇上之前者實為地方之利害計而非為臣一身之生

死計也伏懇

皇上垂念封疆弘開

天慈允賜罷斥臣料今生無由仰報而啣結之私惟永
矢之生生世世矣謹具

奏

聞伏候

勅旨

康熙四十一年八月十八日奏

明白回奏疏

奏為遵

旨明白回奏仰祈

睿鑒事康熙四十一年十月初一日准吏部咨湖廣總督郭琇奏為微臣病實難支謹遵

旨奏明仰祈

睿鑒允賜罷斥事一疏康熙四十一年九月初九日奉旨郭琇原係有罪革職之人特旨起用授為湖廣總督

初陞見時朕詢問地方情形郭琇輒奏稱楚地易治
於湖南丈量田畝復言刻期可以告竣不致擾民朕
之擢用郭琇原欲其經理地方綏輯兵民非為其能
出大言畀以重任今丈量一事時日甚久始行題覆
紅苗屢肆搶掠殺傷兵民匿不奏聞亦漫無籌畫又
所屬知府揭報黃梅縣知縣李錦虧空錢糧郭琇等
並不詳察即輕率題叅委官署印以致百姓妄行聚
衆擅閉城門初叅時不能詳察百姓閉城時又不能

禁戢此皆大負職掌之處凡所行俱與所言不符此等事情著郭琇一一明白回奏該部知道欽此咨移
到臣欽此欽遵臣跪誦

綸音惶悚無既蒙

皇上不即加臣罪令臣明白回奏感激流涕謹望

闕叩頭恭謝訖竊臣一介寒微至愚至陋自縣令歷任

左都御史識淺才疎致多不職乃蒙

聖慈特賜寬宥放歸田里於康熙三十八年內

特起臣湖廣總督之職復承

恩允陞見蒙

皇上詢問地方情形臣思我

皇上德威遐布四海昇平天下晏如恭逢

堯舜之世正臣竭効犬馬之時遂以楚地易治之言回

奏詎自回任之後未竟一載痰症復作臣實心有餘

而力未逮此臣輕言之罪何能追也又湖南田地

從前丈量因奉行未善致多不均臣蒞任之時據

有里民呈訴不無豪強隱漏良懦包賠臣仰體我皇上惠愛羣黎至意冒昧

奏請清丈因慮有司奉行未善反藉擾民并

請以武昌道莊播衡永郴道董廷恩長沙府知府王奕曾三員督率其事週歲之內或可告竣不致擾民具奏在案於三十九年三月內准戶部咨行到臣臣隨分委莊播等三員單騎減從自裹行糧分途查丈內有善化等州縣衛原係均平毋庸察勘

零陵等州縣間有數戶不清止按不清各戶清查均平其有長沙等州縣衛不均田糧則挨丘捲丈以餘補缺與額無虧據各呈報士民羣集歡呼咸稱永無偏累隨於四十年四月內具

題在案於六月內准戶部咨行臣將各州縣衛均平田賦數目分晰造冊送部隨行據湖南布政司詳稱零陵等八州縣因間有不均之戶清查均平非通邑捲丈可比毋庸造冊其捲丈之長沙等二十

五州縣除衡陽衡山二縣丈出田糧銀米已經造具陞科冊費報其餘州縣係以有餘補不足仍與三十一年造報原額無虧是今日均平之數即三十一年造報之原額也若復行查造恐不肖有司藉名造冊派費以致累民詳請咨部免行造冊等因於七月內咨覆戶部在案於九月內又准戶部咨行臣仍應造冊隨行據布政司詳稱各州縣田糧數目均平清楚照數徵輸相安無事今若飭令

造冊送部勢必驟行攢造難免驚動闔邑而原無
包賠不清之戶反受其累請再咨部免造等因於
十一月內咨部在案又於四十一年二月內戶部
咨臣照依各州縣衛所送布政司底冊抄錄送部
隨行據都司將岳州等五衛照依底冊抄錄詳實
據布政司將捲丈之長沙等二十五州縣原送司
底冊抄錄詳實并稱零陵等八州縣非挨址捲丈
原未取冊無憑抄錄各等因於六月閏六月兩次

咨送戶部又於閏六月內准戶部咨以湖南丈量
田地後果否俱已清楚有無題奏之處行臣隨
據布都二司各查明丈量田地之後悉皆均平清
楚並無應行

題奏之處回覆隨於八月內咨部并具疏

題明在案是湖南丈量一事以三十九年三月准咨
之日計算於四十年四月內具

題雖已週歲告竣惟因戶部屢次駁令造冊而臣據

詳請免造冊遂致往返駁取遲延至今此又臣疎忽之罪不能逭也至於鎮算紅苗臣於三十八年七月十五日到任時查前任督臣有

題報紅苗出擾邊民截陷弁兵一案已奉

旨相機撫勦臣仰體

皇上柔遠洪慈行令該管文武官弁多方化誨相機撫勦勒退截陷兵民據領兵參將朱紱等呈報被陷兵民俱已陸續追出撫懾事竣

題報在案後因鎮筰一協設在苗邊協管汎廣兵單
經臣

請以沅州鎮總兵移駐鎮筰彈壓嗣因總兵張大受
駁兵無術

題參草職蒙

皇上將南陽鎮總兵雷如調補鎮筰臣不次照行該管
鎮道於所屬紅苗土民加意綏輯恩威並用照會
議善後事宜實力舉行勿生事滋擾勿急急貽誤

各在案於四十年三月內有瀘塘人楊通智等之妻係兩頭羊苗人之女因索債不還捉陷勒贖遊擊沈長祿帶兵至老家寨遊巡致截陷兵丁十一名臣據報

題參在案臣思苗性狡悍出沒攘竊乃其故智武昌距草甚遙誠恐鎮將事先懈於防禦事後畏懼參罰或有隱諱文飾密行辰沅靖道查報據辰沅靖道僉事吳國士呈稱鎮草紅苗性類犬豕攘竊為

智惟在邊防將士守禦得宜不致疎懈長奸則邊境羣黎自獲寧謐然苗類繁多良頑不一沿途三百餘里苗土界址相連或有偷竊爭鬪互相勒贖猶之民間鼠牙雀角挾私報復之愚原非驚擾內地者可比實與腹地無知細民鼠竊爭訟無異此又在地方文武權其事之輕重即與之剖斷而詳結也緣奉飭行密查相應據實呈覆等因臣查鎮算乃楚南極邊所屬紅苗與五寨算子等土司土

民比寨而居貿易結姻彼往此來鼠竊雀角事實
有之誠如

皇上之洞鑒也第臣愚以鎮臣道府皆蒙

皇上簡用之員必能盡心料理保愛身命或可無疎懈
隱匿之虞至督撫提臣職任封疆事有應查結者
即行查結曷敢輕率冒瀆致煩

聖慮總之臣因夙疾未痊心思志慮昏庸日甚以致邊
方事務未能確訪入

告上厯

聖懷此臣失於覺察及漫無籌畫之罪又難追也再黃
州府知府許錫齡揭參黃梅縣知縣李錦虧空一
案因李錦經徵四十年四月完半錢糧至七月尚
有未完銀三千一百餘兩據司道府揭報撫臣即
據揭會臣指參例應委員署事清查是否侵那民
欠該縣愚民一時閉城留印不放署官進城臣隨
委令武昌府知府尤汶前往撫諭著令署官上任

清查錢糧如無虧空或參後全完即為

題請復任而愚民執迷不悟臣思若差兵查拿勢必
驚擾不寧遂令李錦暫行視事一面清查錢糧一
面查拏為首聚眾之人後經查審李錦並無虧空
因其居官頗優百姓愛戴

題請還職仍留原任是先未經詳察即據揭會參迨
百姓閉城又不能禁戢此實臣大負職掌之罪也
我

皇上至聖至明無微不照臣非草木具有心胸寧不思
仰報

君恩無奈病勢纏綿兼之南地濕熱水土不調以致心
神恍惚耳目聾瞶諸事廢弛貽誤地方言行相違
允屬不能稱職有負

特用之隆恩雖百死莫贖又復何辯伏懇

聖慈立賜罷譴以為人臣之負

恩不職者戒臣惟席藁待罪不勝惶懼之至緣係遵

旨一一明白回奏事理字多逾格貼黃難盡伏乞

皇上睿鑒施行

康熙四十一年十月初六日奏

據實奏陳疏

奏為遵

旨明白回奏仰祈

睿鑒立賜罷譴事康熙四十一年十月十八日准吏部

咨為特參玩愒溺職之督撫等事考功清吏司案

呈奉本部送吏部抄出兵科掌印給事中宋駿業
題前事康熙四十一年九月二十一日題本月二
十五日奉

旨這所參事情著郭琇金璽林本直雷如各明白回
奏該部知道欽此相應抄錄原疏移咨該督欽遵施行
計抄疏一紙咨移到臣欽此竊臣質本庸愚任楚
三載涓滴未報不能稱職大負

聖恩已遵前

旨一一明白回奏惶悚待罪今垣臣宋駿業疏參復蒙
皇上不即賜罷譴令臣明白回奏跪捧

恩綸感激涕零敢不據實陳

奏也夫垣臣之參臣玩愒溺職蓋由鎮草士民叩

閣一疏內叙紅苗搶掠殺傷屢行不法等語因而具疏

題參是雖勦說他人之唾餘然臣返躬自問而覺

垣臣之參奏誠是臣未敢以為非也蓋湖廣鎮草

一汛在楚南極邊與五寨土司同城迴環皆土民

邊牆舊址之外乃紅苗巢寨苗民性最狡詐攘竊
為智加以五寨箠子二司土民及辰谿麻陽瀘溪
淑浦各縣邊地之民性以相習奸頑平日與苗結
姻交易彼往此來因而欺詐騙害爭鬪報復搶牛
盜馬捉人勒贖多由奸民啟釁而擾及良善往往
有之但該管文武權其事之輕重大小有應詳報
題究者如前奉

旨相機撫勦及遊擊沈長祿等遊巡不慎俱經先後會

題結案者是也亦有應詳報批飭審究者亦有應該
管官自行查結者實與腹地無知細民鼠竊爭訟
無異故不敢輕率冒瀆

宸聰妄動師旅以開邊釁也然臣職任封疆乃不能化
誨邊地使苗人畏懷懾服與土民相安致有李豐
等叩

閤上厘

聖懷是不待垣臣之疏參而臣罪亦難辭此臣之撫綏

無術所當先行罷斥者也至叩

闕一案已奉

旨著趙申喬等會同詳察審明具奏是紅苗情形應聽
察審回奏上請

廟謨再垣臣參臣向驚虛聲近益衰廢臣思臣自縣令
以至行取濫厠朝班且蒙我

皇上不次優擢詎臣賦性愚直才識疎淺多不稱職罪
已莫贖乃又蒙我

皇上包容寬宥於康熙三十八年復

特旨起用此臣之一身自始及終俱係我

皇上高厚深恩以致有今日臣尚不能仰酬於萬一是
可徵臣原無虛聲又何虛聲之可驚至謂臣近益
衰廢則果如垣臣之言蓋臣年已六十有五痰證
纏綿日甚一日精神委屬不及思慮委有不周况
楚省幅員廣濶邊方軍務即才力精健者亦惴惴
乎曠職之是懼臣以殘疾之軀肩此重任猶謂能

不貽誤地方臣亦未敢自信此臣之尸位無用又
當即行罷斥者也總之諸凡廢弛漫無籌畫皆臣
一人病之所致有負

特用之隆恩伏懇

皇上俯允垣臣所奏將臣立賜罷斥另選賢員接任則
欽差到彼察審官民亦無瞻顧隱飾之嫌並請


勅部擬臣之罪以為人臣之溺職者戒而接任之臣亦
知所警惕矣臣不勝惶懼待

命之至謹遵

旨明白回奏字多逾格貼黃難盡伏乞

皇上睿鑒施行

康熙四十一年十月二十日奏



華野疏稿卷五